

# Polo Timotin Wakmwaek Kumwimp Pas

Mekia Akwapnám Kar

Jisas pok tenánko, 36 yopwar niamp arake fek, Polo Rom mek kalabus mek yakria má má pas ankwap Timotimpor kumwimpon.

Polo Rom mekamp Gavmano man farop pap mwanap wae wonae fiknám mér nám kwamp, wakmwaek kar má pas kumwi námpon. Mao te 'Amo Jisasomp e érik séria, Kwaromp Kwapwe Kare Karamp kare kar karan sámp-fákeyakamp'rá sér. Tá touwe kwatae, tá man sámpá yampourou mwanap ninik korop námpao maok, Timotin 'Kwaro sánknám térean pwar kwaponó, ankár kárákáre fek téreamp'rá sénámpon.

---

**1** <sup>1</sup> Ono Pol te Kraís Jisasomp aposelono. Kwaro námokuráp ninik fek onan aposel pap nám te, ono koumteouráp aropan, mao má má yiki yak Kraís Jisasén mérnáp fárákapan nénk nanamprá séri nám táman séreraeria ninámpon.

<sup>2</sup> Timoti, amo te onomp karwaok napantá, amo te onokump táráp kare niamp naponoria, ono waráp por má pas má kumwi rae. Ono ninik namp te, Kwar Naropwar ntiaka Kraís Jisas nomp Tokwae Karao námokuráp ninik fek amwan ninikia aropompia yonkwae porokwe papanoria nae.<sup>a</sup>

## Kwaromp karan pwarápaentánám kar

<sup>3</sup> Onomp tékénou fákáreráo wokwaek kar Kwaromp ninikaok tukupapnám taknám, ono kuri mántwaok akwap nampon. Aeria maok, ono ninik namp te, Kwaro nke nám fek kwatae niniki namp yak mo námpono. Ono kumuruk yámarao amwan ninikriaka Kwarén kar toropwap namp fek, man 'Aesio'rá sér i konampon.<sup>b</sup> <sup>4</sup> Amo onan yonkwae touweria ém napantá, onomp ninik te amwan warko nkea, am fek warákár nae kar nampono. <sup>5</sup> Amo Kraisé mэр kare nap te wokwaek waráp kupwiwaráp Lois, tá waráp éntupwar Yunis maomp mérep niamp kwekár mono, kare kar nap ono wae mér nampono.<sup>c</sup> <sup>6</sup> Ae namp

---

<sup>a</sup> 1:2 1 Ti 1:2   <sup>b</sup> 1:3 Ap 24:16   <sup>c</sup> 1:5 Ap 16:1

kwamp maok, amwan warko ninikampria sér rae. Kwaromp ourour waráp pourouk yak námp, am te ono wokwaek kar waráp me korok yae pap nanko sámpap ourour táman oukoumwan kuri amo am ourour tokwaeanoria tére kárákáre nap te, arop yaomwian fur napo, yurunk tokwae konámpnám araknámpanpo. <sup>7</sup>Amo te wae mérono, Kwaro nomwan sápám Spirit te nomwan apáp sáp naenám Spiritan mono. Mao nomwan sápnám Spirit te nomp waempén kárákáre nénk námp, tá nomp Kristen ankwapyaenáp fákáreran nouroup kateria, nomoku nomp yakáp fwapia poukeyakáp mwanám ninikan ti-sáp námpon.<sup>d</sup>

<sup>8</sup>Aenámpara, amo nomp Tokwae Karamp kar farákáp nap te pwarápae kwaponono. Tá amo ono kalabusi yak namp táman kor pwarápae kwaponono, mono. Amo ankár Kwaromp kárákáre sámpea onont am Kwapwe Kare Kar farákápnap tére fek onont touwe sámpampo.<sup>e</sup>

<sup>9</sup>Kwaro nomwan wumwiria warko érékép námp te, apae nomo kwapwe kare ninik nánko, nomwan warko érékép námpanápe. Mao námokuráp ninik fek nomwan koupoutáráp napria ninikia nomwan érékép námpon. Wokwaek kar Kwaro má apár oukoumwan yoro moi yakrá, nomwan námokuráp ninik fek niniki tarimpan Krai Jisasén érik sámp-kérépámpon.<sup>f</sup> <sup>10</sup>Aeno oukoumwan mómá ke fek te Krai Jisas nomwan éréképnám arop wae érik korop námp fek, Kwaromp aropompao kor wae érik korop námpon. Krai Jisas te sumpwiramp kárákáre wae kwepwate nánko, maomp Kwapwe Kare Kar koumteouráp arop waria wae yiki yaká yakáp mwanap mér napon.<sup>g</sup>

<sup>11</sup>Mao onan 'Kwapwe Kare Kar farákápnap' ria séria sámp-kérépeanánko, ono te koumteouráp aropan am kar yénkrá farákáp konamp aropono.<sup>h</sup> <sup>12</sup>Ae namp kwamp maok, am tére fek táman onan kar wouroump napo kuri, ono pwarápae mo nampon. Ono mérinám Tokwae Karan saráp wae ník nampon. Aeria maok, ono wae mér kare namp te, mao onan sápnám tére te kwaporok pwar mono, ankár taokeyakrá akwapea Kraisomp Yae Tokwae korop námp fek naenámpon. <sup>13</sup>Mámá kar kare amo onomp top kor fekamp wawi nap, am te amo fwapi ninikria, ankár take pourouráp ninik fek arop fárákapan yénkrá farákápnampo. Aeria maok, amo ankár Krai Jisasén mér kárákáreria man warákárria maok, am ninik fek arop fárákapan kar farákáp nanaponono.<sup>i</sup> <sup>14</sup>Amo má Kwapwe Kare Kar Kwaro amwan taokeyakampria waráp yaek pap námp te, am te kwapwe kare kare ankankara, amo fwapia yérék korampo. Aenapo Yiki Kor Spirit nomp ninik mek yak námp, mao fwap amwan am tére nap yaewour naenámpon.

<sup>d</sup> 1:7 Ro 8:15   <sup>e</sup> 1:8 Ro 1:16   <sup>f</sup> 1:9 Ef 2:8-9; Ta 3:4-5   <sup>g</sup> 1:10 Hi 2:14-15   <sup>h</sup> 1:11 1 Ti 2:7  
<sup>i</sup> 1:13 Ta 1:9

<sup>15</sup>Amo te wae mér napon, apár fi Esia mekamp arop ponankor te wae onan pwar, tá Figelus ntia Hermogenes mao kuri wae onan pwar nepono.<sup>j</sup> <sup>16</sup>Aenapantá maok, ono Kwar Tokwaeran sénanko, mao Onesiforusén aropompria maok, maomp séraroan kor aropompanoria nampon. Kápaé kare por Onesiforus te ono kalabus namp te pwarápaé mono, onomp ninik yae-páráki pap saráp yak konámpon. <sup>17</sup>Mao te Rom taun tokwae mek koropeaka onantá oupourounkrá yárakia wakmwaek onan nke námpon. <sup>18</sup>Onesiforuso wokwaek Efesus mek onan yaewour saráp yakám te, amoku am wae mér kare yak napon. Aenámpantá, ono Kwar Tokwaeran sénamp te nánkár mao kot tokwae naenámp Yae fek man aropomp naenámpria nampon.

**Timoti te ankár Kraisomp kwapwe kare soldia yak naenámp kar**

**2** <sup>1</sup>Onomp táráp e, Krais Jisaso amwan námokuráp ninik fek ninikia yaewouránko amo maomp kárákáre sámpea yakamp. <sup>2</sup>Ono wokwaek kápaé kare arop wa nap fek farákápanko, amo wawiap kar táman arop fwap yonkwae kouria arop ankwap farákapan yénkrá farákáp mwanap aropan farákápampo.

<sup>3</sup>Nkwakwe make ankank korop námpon kor yino Jisas Kraisén méria maomp tére konámp, yinont soldia niamp kárákáre fek fokopeyakampo. <sup>4</sup>Arop soldia yak nám te, mao te ankwap-ankwap tére mo i konámpon. Mao te ankár soldia térean saráp yae-párák kare tére nánko maok, taokeyak konámp soldia kor maomp tére warákár naenámp. <sup>5</sup>Arop resisrá foporakor mwaria te, am ‘Foporakorenk’ ria sérinámp aropamp ninikaok foporakoria am ninikaok tukup mo napo te, taokeyaknám aropao sérrá, ‘Amo te ankank sámpono!’<sup>k</sup> <sup>6</sup>Arop yopwar yoroia taokeyak nám te námokurápara, kare nánko toupourria te, manénkir námoku fária, wakmwaek arop nénk konámpono.<sup>l</sup> <sup>7</sup>Amo te ono sénamp kar man ninikampo. Tak napo maok, Tokwae Karao waráp ninik mek kwapwe kare ninik fwap sánk nánko, amo am kar fi ponankor mér nanapon.

<sup>8</sup>Ono Kwapwe Kare Kar sér i konamp te, Jisas Krais te Devito yakám fi mekampao sumpwiaka fárámpámp táman amo ankár fwapia ninikampo.<sup>m</sup> <sup>9</sup>Ono am Kwapwe Kare Kar farákáp konamp te, am fi fek táman arop fárákapao onan nke napo te, ono kwataenamp arop niamp nanko, onan nkwakwe make touwe sápría, fákápá páte napon. Aenapan maok, Kwaromp kar te fákapea pap mono.<sup>n</sup> <sup>10</sup>Aenámpara, ono te ninik kárákáre sám teyakra maok, nkwakwe make touwe korop námpan kuri, sámpea Kwaro naráponoria nánkárápnám arop fákáreran yaewour i konampono. Onomp ninik te, am fárákapao kor ankár am Krais Jisaso

j 1:15 2 Ti 4:16 k 2:5 2 Ti 4:8 l 2:6 1 Ko 9:7,14 m 2:8 Ro 1:3-4 n 2:9 Fl 1:12-14

fákeyaknám̄p yiki yak sám̄pea méntér yakápi-yakápanáponoria nampon.<sup>o</sup>

<sup>11</sup> Nomo te máma kar man mér kare mwanámpono:

“Nomo mént kare kar sumpwianám̄p te,  
warko yiki yakan kor nomo mént yiki yakáp mwanámpon.<sup>p</sup> <sup>12</sup> Nomo  
nkwakwe make touwe korop námpan kor,  
inkirmaneanria kárakáre fek yakeanám̄p te,  
nomo kor mao nám̄pnám̄p méntér king yakáp mwanámpon.  
Aeno nomo man younkwe sirareanánko te,  
mao kuri nomwan younkwe mwaek sinaenámpon.<sup>q</sup>

<sup>13</sup> Táte nomo sérrá, ‘Maonám̄paok tukup mwar’ ri nám̄pao,  
ampaok mo námpon kor,  
mao námoku te námoku sérinám̄paok i konámpon.  
Mao te ankwap kar sér mo i konám̄p karenono.”<sup>r</sup>

**Timoti ankár tére kárakáreria Kwaromp  
tére arop kare yak naenám̄p kar**

<sup>14</sup> Amo te ankár kápae kare por am arop fárakapao wawanáponoria,  
Kwaro nke nám̄p fek amo má kar man kárakáre fek sérrá, “Yumo te kar  
am fik sérarrá yorowari kwapono! Take kar te arop ankárankan yaewour  
mo i konámpon. Am kar wanap aropan te, ninik kwatae pap konámpon.”<sup>s</sup>

<sup>15</sup> Amo te ankár tae fek tére fáparákapiaka tére arop kare yak napo  
maok, Kwaro waráp tére nkea warákár naenámpon. Aenánko maok, amo  
kokwae moria Kwaromp kar kare kar yae-párák kare farákápria maok,  
amo Kwaro nke nám̄p fek kor pwarápae mo nanapon.<sup>t</sup> <sup>16</sup> Aeno aropao  
kwaporok táman sérarnap kar te wawi kwapono, younkwe sánkampo.  
Take kar te Kwarén younkwe sánk mwanap mwaek páraok arop éréképá  
akwap konámpono. <sup>17</sup> Take kar te ankáráp kwataerao akwapea tokwae  
karia arop émi fánám̄p niamp námpono. Himeneus ntiaka Filetus am  
fi mekampao takipon. <sup>18</sup> Am arop yawor te má kar kare máte younkwe  
sirarea arakrá sér i konepon, “Nomo wae warko fáparám̄p nám̄para,  
wakmwaek te warko fáparám̄p mono.” Am makrá sérarep kar te arop  
ankwap fárakapamp méran épérépia kwatae pap nepon.

<sup>19</sup> Aeno Kwaro am fek sios yoro naenám̄p kárakáre kor oumpwar te wae  
yimp tenánko, kárakáre fek fokopeyak námpon. Tá am oumpwar fek kar  
arakrá kumwi, “Kwar Tokwae námokuráp kourmteouráp arop te wae mér  
kari yak námpon.”

Tá ankwap kumwi tenám̄pao kor sérrá,  
‘Námo te Kwaromp firáp aropono’rá  
sér i konap arop ponankor te

<sup>o</sup> 2:10 Kl 1:24    <sup>p</sup> 2:11 2 Ko 4:11    <sup>q</sup> 2:12 Mt 10:33    <sup>r</sup> 2:13 Nam 23:19; Ro 3:3-4; Ta 1:2  
<sup>s</sup> 2:14 Ta 3:9    <sup>t</sup> 2:15 Ta 2:7-8

nkwakwe make ninik kwatae te ankár younkwe sir mwanapon.”<sup>u</sup>

<sup>20</sup> Ankankráp aropamp nap tokwae mek dis tankáp námamp te, gol fek yoroiap, silva fek yoroiap, yao fek yoroiap, kwar fek yoroiap, ará tankáp námpon. Am te ankwapmwaek kwapwe kare téreampor, tá ankwapmwaek te nkwakwe make téreampor.<sup>v</sup> <sup>21</sup> Kwarén mérnámamp aropao am náráp ninik mekamp kwatae ninik ponankor younkwe sinámamp te, Kwaro nke námamp fek yiki kare yak námamp te, mao te ankank yae-párák námamp mwar kák konap dis niampria, amwar kar yak námpon. Aeria Arop Tokwaeran yaewourrá nkwakwe make kwapwe kare tére naeria nanap námpon.

<sup>22</sup> Aenámpara, amo te ménki-tárápuamp ninik mek korop konámamp nkwakwe make kikiank ninik te ankár younkwe mwae pwarampo. Amo te ankár yae-párák kare ninik ntiaka mér napan sámp, ankwapan nouroup i konap ninikan sámp, yonkwae porokwe ninikan sámpea maok, arop ankwap fárákamp yiki kare ninik fek yakáprá Kwar Tokwaeran wumwi ri konap aropént saráp yakamp. <sup>23</sup> Aeno épépérépnámamp arop fárákampamp kar mwar sérarnap kar kwatae te amo ankár younkwe sirampo. Amo te wae mér napon, am takrá sérarap kar te am fek yorowar i konapon. <sup>24</sup> Tokwae Karamp tére konámamp arop te kar yorowar mo, arop ponankor porokwe fekria yonkwae kourráp tisa te man nkwakwe make napo kor yonkwae pwarámp mo i konámpon.<sup>w</sup> <sup>25</sup> Aeria maok, maomp kar ták-pwarnap aropamp ninik porokwe fek fwapokwap nánko maok, am támao Kwaro am fákáreran yaewouránko maok, am ninik pwararea má kar má fwap mér mwanapon. <sup>26</sup> Am kwekár i konap tisa fárákapan Satano náráp umben mek tirá kérépámp te, am fárákamp náráp ninikaok paokop mwanapria nimpon. Aeno má kar kare man mér napo te, am fárákampamp ninik warko érik farákár nánko maok, Satanomp umben pwarará amwar yakáp mwanapono.

### Pwar naenámp yae fek mwanap kar

**3** <sup>1</sup> Aeno amo ankár yae fápaie nánko te kápae kare touwe kwatae kare korop naeria námponorá mérampo.<sup>x</sup> <sup>2</sup> Am te arop fárákapao námoku saráp warákár, tá manian kikiank kare mwarea napon. Arop fárákapao námoku támao warákár sérarrá, tá nomoku saráp kwapwe kare námponoria wae, tá ankwapan wouroump-sér mwarea napon. Tá éntupwar naropwaromp karan kor kwe-sir, tá arop fárákapao námwan yaewour kwapwe napo, am fárákapan ‘Aesio’rá sér mo mwarea napon. Kwaromp kwapwe kare ninikan kor wouroumprá amomoránk mwarea napon.<sup>y</sup> <sup>3</sup> Námokuráp firan kor aropomp mo. Wokwaekamp ankankan niki sayakrá yorowar. Aeriaka e-poup sérarrá paokopria

<sup>u</sup> 2:19 Jo 10:14-15   <sup>v</sup> 2:20 Ro 9:21   <sup>w</sup> 2:24 1 Ti 3:3   <sup>x</sup> 3:1 1 Ti 4:1   <sup>y</sup> 3:2 Ro 1:29-31

maok, námokuráp kikiank i konap ninikao tokwae kari yak nánko maok, námokuráp pourou fwapia poukeyak mo mwarea konapon. Ankár yonkwae pwarámpria aropomp ninik kánanke te yak mo kareria, kwapwe kare ninikan kor mént wouroump mwanapon. <sup>4</sup>Aeria maok, námokuráp firan kor ankwapan outiri mwanapon, tá námokunap ninik kápae kare kwataeran ti-paokopria maok, námoku támao ninikrá, ‘Yino te Arop Tokwaeno’rá warákár-séria, námokuráp pouroukamp nkwakwe make ninik táman warákáránkrá paokopria maok, warko Kwarén warákár mwarea napon. <sup>5</sup>Aeria maok, Kwaromp ninikaok tukup nap te némpi párák pourouan sarámpria maok, Kwaromp kárákáreran méria kare karonorá ninik mo. Amo taknap aropént yak kwapon.<sup>z</sup>

<sup>6</sup>Am taknap tisa fákáre te sánánkar porokwe fek tukupea, ninik fwapi kárákáre moria, náráp wokwaekamp kwatae ninikan ninik tokwae, tá náráp ninik mek nkwakwe make kikiank ninik koropánknámp koumteouramp nap mek tukupea, am fárákapan kar porokwerá sér i konapon. <sup>7</sup>Am taknap koumteou yonkwae kour kwapwe ankár sámp mwaria napao maok, am kar mér mwanap pourou mo. <sup>8</sup>Wokwaek Janes ntiaka Jambres Mosesén yorowarrá yárákipnámp taknámp am arop fákáreao kor má kar kare man kor yorowarrá paokop napon. Am fárákapamp kar yurukup mwanap ninik te kwatae akwap tenánko, maomp Kwarén mér napao kuri kwekár napon. <sup>9</sup>Wokwaek kar Janes ntiaka Jambres arop nkeap fek takrá ninikrá yárákriaka tokwaeri ke fek yak moipon. Aempnámp taknámp am tak nap ninik te arop ponankor nke nap fek érik korop naenámpon.<sup>a</sup>

### Timoti ankár Kwaromp kar kárákáre fek samp naenámp kar

<sup>10</sup>Aeno amo te wokwaek ono amwan warámpea yárákria aropan kar yénkrá farákáp konamp te am ninik wae mér napon. Aeria maok, onomp yárák, tá am fi kor ninik te amo wae mér napon. Ono Kwarén mér kárákáre namp, tá nkwakwe make kar korop námpan kor sánánkar ninik kárákáre sámpea akwap namp, tá arop nouroup namp, tá kárákáre fek fokopeyakria tére pwar mo namp, am te amo wae mér napon. <sup>11</sup>Antiok, Aikonium, Listra taun mekamp arop fárákapao onan sámpá yampourou napo, ono nkwakwe make touwe tokwae kwatae sámp namp te amo wae mér napon. Aenampan maok, Kwaro onan yaewour nánko, am kápae kare touwe kwatae korop námpan kor, fwap yakampon.<sup>b</sup> <sup>12</sup>Karenono, arop ponankor Krai Jisasént yakáprá Kwaromp ninikao paokopnap aropan te, Kwarén mér monap aropao nkwakwe make sokoro i konapon.<sup>c</sup> <sup>13</sup>Aeria maok, kwatae ninikráp arop, tá kwekár profet fákáre,

<sup>z</sup> 3:5 Mt 7:15,21; Ta 1:16    <sup>a</sup> 3:8-9 Kis 7:11-13    <sup>b</sup> 3:11 Ap 13:50; 14:5,19-20

<sup>c</sup> 3:12 Jo 15:20

makia kourteouráp aropan poupwekáp mwarea napon. Satano kor am fárákapan kwekáránko maok, am fárákapamp ninikao kor kwatae kare naeria námpon.

<sup>14</sup>Aeno amo wokwaek wawia mérinap kar máte kárákáre fek sámpea yarakampo. Tá kourteouráp arop yino am kar yénkrá farákápamp te, amo waeman mér kare napon.<sup>d</sup> <sup>15</sup>Manénkir amo oukoumwan épérmou táráp yakap feknámpia Kwaromp yiki kor Buk fekamp kar mér sámpap te, amo wae mér napon. Am buk te amwan fwap ninik kwapwe sánk nánko, amo Krai Jisasén méria napo, Kwaro amwan warko warámp naenámpon. <sup>16</sup>Kwaromp Buk fekamp kar ponankor te Kwaromp Spiritao ninik sánk nánko kumwi napon. Am kar te nomwan yae-párák kare ninik yénkrá farákáp naenámp kwapwe karon. Tá kourteouráp aropamp ninik kwataenámp érik yénkria, nomp paokop fwapokwap i konámpono.<sup>e</sup> <sup>17</sup>Aenámpara, am kar támao Kwaromp kourteouráp arop nomwan yaewourianánko, nomo ponankor kwapwe kare ninik pwi nánko, nomo fwap nkwakwe make kwapwe kare tére ponankor tére mwanámp nánap mwanámpon.

#### Timoti ankár kárákáre fek Kwaromp kar farákáp naenámp kar

**4** <sup>1</sup>Krais Jisas te yiki yakápnap aropan ponankor yurukupria, sumpwinap aropan kor mént yurukup naenámpon. Mao te arop ponankor nke nap fek érik koropeaká king yaká yak naenámpon. Ono amwan Kwar ntiaka Krai Jisaso nkenep fek amwan kar kárákáre fek arakrá sér rae:<sup>f</sup> <sup>2</sup>Amo ankár kárákáre fek Kwaromp kar farákápampo! Arop am kar wa napan, tá wa mo napan kuri, amo te ankár kárákáre fek am kar farákáp saráp yakampo. Amo te ankár méranáponoria kárákáre kor kare kar farákápria yoporria, yumo fwap tak mwanaponorá warákár sánkampo. Amo kokwae moiaka, porokwe fek kánámpár am fárákapan yénkrá farákápampo.<sup>g</sup> <sup>3</sup>Nánkár wakmwaek arop Kwaromp yae-párák kare kar te warko wa mo mwarea napon. Am fárákap ankwap-ankwap kar wa mwar kar napan wa mwaria, am kar farákáp mwanap aropan wumwi mwarea napon.<sup>h</sup> <sup>4</sup>Aeria maok, má kar kare pwarará maok, nkwakwe make kwaporok kar mwar sérarap kar táman woupwi pátea wawia mántwaok tukup mwarea napon. <sup>5</sup>Aeno amoku kare te ankár kápae kare por ninik kouri yakrá maok, nkwakwe make touwe korop námpon kor kárákáre fek fokoheyakria maok, amo Kwaromp Kwapwe Kare Kar táman téreria kourteouráp aropan farákápamp. Amo te kourteouráp aropan yaewour nanap tére yak námpara, amo ankár am táman fwapia téreamp.

<sup>d</sup> 3:14 2 Ti 2:2    <sup>e</sup> 3:16 2 Pi 1:21    <sup>f</sup> 4:1 Ap 10:42; Ro 14:9-10    <sup>g</sup> 4:2 Ap 20:20,31

<sup>h</sup> 4:3 1 Ti 4:1

### Pol wae sumpwi naenámp wonae fik nánko sénámp kar

<sup>6</sup>Aeno oukoumwan te ono sumpwi nanko, onomp yiri Kwarén ofan sánk mwaria wain ént kwarákár konapnámp kwarákár naenámp te wae wonae fikeane. <sup>7</sup>Ono yorowarrá akwapea kwe-sira nampon. Ono te wokwaek resis kwapwe fárakoprá yáraki namp te, oukoumwan te ono te wae akwapea wonae fik yarápae fek yak nampon. Ae namp te, ono Kwarén mér namp kárákáre fek sámpá yáraki nampon. <sup>8</sup>Oukoumwan te am fárakoprá akwapea pwar namp fek sámp nanamp ankank te wae nánapia tank námpon. Am sámp nanamp ankank te ará: Tokwae Karao yae-párák kare yurukup konámpara, onan ‘Yae-párák kare aropono’rá sénaenámp. Am Yae Tokwae fek te onan makrá sénaenámp. Aeria maok, onan saráp sér mono, arop ankwap fárakap mao érik korop nánko nke mwar karrá yépékrá yakánpap arop fárakap man kor sénaenámp.<sup>i</sup>

### Kar pwarnámp kar kánanke

<sup>9</sup>Amo te ononampok koupour koropampo. <sup>10</sup>Demas te onan pwar akwap teane. Mao te apárokamp ninikan warákárria taun Tesalonika mek akwap teane. Kresenso kor provins Galesia mek akwap, tá Taituso kor distrik Dalnesia mek akwap námpon. Luk mwar yino yak nempon. <sup>11</sup>Amo Mak warámpea koropampo. Mao te ono tére nanko yaewour kwapwe konámp aropono.<sup>j</sup> <sup>12</sup>Ono Tikikusén taun Efesus mek sámp-kérép nampon.<sup>k</sup>

<sup>13</sup>Amo korop naeria te onomp waempyam taun Troas mek Karpusomp nap mek pátari namp, ará sámpea maok, tá buk mént sámpea koropampo. Aeria maok, onomp fir yipi fek yoroiap buk nik mo pwar korop nanape. Ankár sámpea koropampo.<sup>l</sup>

<sup>14</sup>Aleksander te bras fek nkwakwe make ankank yoro i konámp arop, mao te onan ouroukup konámpara, nánkáráp Tokwae Karao am taki námp fek nopok man touwe sánk naenámp.<sup>m</sup> <sup>15</sup>Amo kor am aropan fwapia mérampo. Mao te yinomp karan kor ankár kwekápia sira námpon.

<sup>16</sup>Ono woukourouk kot nap fek te arop ankwapao onont yakria yaewour mo napo maok, arop ponankor onan pwate napo, onoku mwar yak. Aeria ono Kwarén sérrá, ‘Am fárakapao tak nap ninik te nik mo pwarampo.’ <sup>17</sup>Aeno Tokwae Karao onont yakria onan yaewouria kárákáre sáp námpon. Aenángo maok, ono Kwapwe Kare Kar fwap farákáp nanko, ankwap fi ponankor wa naponno. As fir yamp nánko, as táp mekamp akap konapnámp taknámp, Kwaro onan yopor aropamp yae kwae mekamp pwarokwap námpono.<sup>n</sup> <sup>18</sup>Kwar Tokwaerao onan sokoro

<sup>i</sup> 4:8 Yé 2:10   <sup>j</sup> 4:11 Ap 15:37-39   <sup>k</sup> 4:12 Ef 6:21-22   <sup>l</sup> 4:13 Ap 20:6   <sup>m</sup> 4:14 Ro 2:6;  
1 Ti 1:20   <sup>n</sup> 4:17 Ap 23:11; 27:23

napo kuri, fwap yaewourria onan warámpea, námoku poukwapnámp yámar mek pwar naenámpon. Nomo maomp eran sámpeaka sakap saráp yaká yakáp mwanámpon.

**Kar pwarará ‘Gude’rá sénámp kar**

<sup>19</sup>Amo Prisila ntiaka Akwila, tá Onesiforusomp séraroan kor mént ‘Yumwan Polo Guderian’rá sérampo.<sup>o</sup> <sup>20</sup>Erastus te oukoumwan taun Korin mek yak nánko, Trofimus kor touwe nánko, man taun Miletus mek yak nánko pwara nampon.<sup>p</sup> <sup>21</sup>Amo te koupour mwae oupouroukia koropampo. Takria amo yépék napo, ouwi tokwaenámp ke koropantáno.

Yubulus, Pudens, Linus, Klodia, tá Kristen ankwapyae fákáre makia amwan ‘Gude’rá sénap kar sámp-kérép naponu.

<sup>22</sup>Ono ninik namp te, Tokwae Karao waráp waempént yakanoria nampon. Tá yumwan ponankor námokuráp ninik fek ninikia yaewouranoria nampon.